

12 Mawrth 2018

Sophia Gardens | Gerddi Sophia  
Cardiff | Caerdydd  
CF11 9SW

T / Ff 0300 300 3111

www.sport.wales  
www.chwaraeon.cymru

Nick Ramsay AC  
Cadeirydd  
Pwyllgor Cyfrifon Cyhoeddus  
Cynulliad Cenedlaethol Cymru  
Caerdydd  
CF99 1NA

Annwyl Nick

Diolch i chi am y cyfle i gynnig tystiolaeth i'r Pwyllgor Cyfrifon Cyhoeddus ynghylch craffu ar Adroddiad Blynyddol Chwaraeon Cymru 2016/17. Mae'r archwiliad a'r her bob amser yn werthfawr i'n sefydliad ni ac rwyf wedi darllen Adroddiad y Pwyllgor a'r argymhellion gyda diddordeb.

Rwyf yn amgáu ymateb Chwaraeon Cymru, yn rhoi sylw i argymhellion perthnasol y Pwyllgor (14, 15 ac 16). Mae hyn yn ychwanegol at y dystiolaeth ategol a gyflwynwyd i'r Pwyllgor, yn amlinellu rhaglen o adolygiadau, a grynhoir yma fel atodiad er hwylustod.

Fel y gwyddoch, mae'r ffordd ymlaen ar gyfer llawer o'r heriau mewn chwaraeon yn dibynnu ar gydweithredu a gwaith partneriaeth cadarn. Adlewyrchir yr egwyddor honno yn yr ymateb hwn ac edrychaf ymlaen at weithio gyda'r Pwyllgor yn y dyfodol.

Yn gywir



Sarah Powell  
Prif Weithredwr

## Ymateb Chwaraeon Cymru

### Pwyllgor Cyfrifon Cyhoeddus: Craffu ar Gyfrifon 2016-17

Isod mae ymateb Chwaraeon Cymru mewn perthynas ag Argymellion 14, 15 ac 16 o'r Pwyllgor Cyfrifon Cyhoeddus, Craffu ar Gyfrifon 2016-17.

**Argymelliad 14.** *Mae'r Pwyllgor yn argymell bod Chwaraeon Cymru'n rhannu canlyniadau'r gwerthusiad o'u Rhaglenni Pobl Ifanc gyda'r Pwyllgor Cyfrifon Cyhoeddus ar gyfer eu hystyried.*

#### Ymateb Chwaraeon Cymru

Byddwn yn rhannu canlyniadau'r adolygiad allanol sydd ar droed ar hyn o bryd ac a fydd wedi'i gwblhau erbyn diwedd mis Mehefin 2018.

Mae Chwaraeon Cymru wedi darparu tystiolaeth ysgrifenedig ychwanegol i'r Pwyllgor ynghylch yr amrywiaeth o adolygiadau a gwerthusiadau sydd wedi'u cynnal hyd yma o'r rhaglenni pobl ifanc. Crynhoir y rhain yn yr atodiad er hwylustod. Efallai y bydd y Pwyllgor eisiau nodi bod yr adolygiad presennol o'r rhaglenni pobl ifanc a nofio am ddim wedi'i gynllunio fel rhan o gylch cynllun busnes Chwaraeon Cymru a'u cytuno gyda Llywodraeth Cymru fel rhan o'n gwaith gwerthuso a monitro arferol. Cafodd hyn ei nodi yn ein Cynllun Busnes a gyhoeddwyd ar ddechrau 2017-18.

Cyhoeddir canfyddiadau'r adolygiadau ar wefan Chwaraeon Cymru a'u rhannu gyda rhanddeiliaid allweddol ac fe'u defnyddir i ddylanwadu ar ddatblygu Strategaeth newydd i Chwaraeon Cymru.

**Argymelliad 15.** *Rydym yn argymell bod Chwaraeon Cymru'n monitro effaith yr hyrwyddo ar gaeau 3G ar fynediad i gaeau o eiddo awdurdodau lleol, gan rannu canlyniadau'r monitro hwn gyda'r Pwyllgor hwn, a gweithio i sicrhau bod y cyfleusterau'n parhau mor hygyrch â phosib i bawb.*

#### Ymateb Chwaraeon Cymru

Mae Chwaraeon Cymru'n gweithio mewn partneriaeth â chyrff rheoli chwaraeon cenedlaethol i fonitro effaith buddsoddiad Chwaraeon Cymru ar gaeau 3G. Mae'r bartneriaeth gydweithredol hon rhwng Ymddiriedolaeth CBDC, Undeb Rygbi Cymru a Hoci Cymru wedi cael ei sefydlu er mwyn cynllunio'n strategol a darparu cyngor arbenigol i ddatblygiadau caeau artiffisial yng Nghymru. Cwblhawyd Adroddiad Gwerthuso ym mis Mawrth 2017 i fonitro effaith ac mae copi llawn ar gael os oes angen. Mae canfyddiadau crynodeb gweithredol yr adroddiad hwn yn dangos y canlynol:

#### Canlyniadau Allweddol

*"Ddwy flynedd ers ei sefydlu, mae'r prosiect yn cyflawni ei nodau tymor byr a chanolig. Mae pedwar prosiect ar ddeg wedi cael eu cwblhau ac mae cyllid wedi cael ei neilltuo i 22 o safleoedd pellach. Mae'r astudiaethau achos a'r ymgynghoriad â rhanddeiliaid yn dangos bod buddsoddiad wedi galluogi'r canlyniadau canlynol hyd yma:*

- *Cynyddu cyfraddau cymryd rhan gyda'r defnyddwyr presennol yn cymryd rhan yn amlach a defnyddwyr newydd yn cymryd rhan yn awr.*
- *Mwy o gyfleoedd i ferched, genethod a phlant.*
- *Hyfforddwyr i arsylwi gwelliant yn lefelau sgiliau chwaraewyr a mwy o gyfleoedd i gystadlu a datblygu perfformiad.*
- *Gwell profiad i gyfranogwyr a chlybiau, a theuluoedd yn awr yn gallu defnyddio cyfleusterau o ansawdd uchel i osgoi canslo gemau a sesiynau ymarfer drwy'r amser.*

- *Rhyddhau caeau glaswellt sy'n cael eu gorddefnyddio, i'w hansawdd wella, a mabwysiadu dull mwy strategol o weithredu gyda defnydd o gyfleusterau ar draws rhanbarth.*
- *Modelau hwb clwb yn cynnig cyfleoedd aml-chwaraeon/aml-weithgarwch mewn lleoliadau canolog, gan geisio denu teuluoedd a defnyddwyr newydd fel rhan o ddarpariaeth ehangach yn gysylltiedig ag arwynebau artiffisial.*
- *Osgoi colli cyfleusterau'n llwyr, neu golli camp benodol mewn rhanbarth."*

Hefyd mae Chwaraeon Cymru wedi ymrwymo i weithio'n agos gydag amrywiaeth o bartneriaid (cyrff rheoli chwaraeon cenedlaethol, awdurdodau lleol a darparwyr eraill) i sicrhau bod cyfleusterau chwaraeon ledled Cymru ar gael, yn fforddiadwy ac yn hygyrch i glybiau a grwpiau cymunedol. Hefyd, yn ychwanegol at yr Adroddiad Gwerthuso a grybwyllwyd, mae gan Chwaraeon Cymru nifer o ymyriadau yn eu lle er mwyn deall effaith y caeau 3G yn well:

Mae bas data cynhwysfawr Cyfleusterau Chwaraeon Ledled Cymru wedi cael ei sefydlu. Mae'n cynnwys manylion am yr holl arwynebau chwarae artiffisial, a hefyd caeau glaswellt naturiol, yng Nghymru. Bydd y bas data'n monitro newidiadau i nifer y caeau sydd ar gael ac a oes unrhyw newidiadau mewn perchnogaeth dros amser.

Hefyd mae'r bas data hwn yn cyfrannu at ein sylfaen wybodaeth am gaeau drwy nifer o ddadansoddiadau, gan gynnwys y canlynol:

- Model Cynllunio Cyfleusterau
- Penderfynu ar Elw Cymdeithasol ar Fuddsoddiad (SROI) cyfleusterau chwaraeon adeiledig
- Gweithio gyda Phrifysgol De Cymru i edrych ar hygyrchedd i amrywiaeth o gyfleusterau, gan ddangos lle ceir tanddarpariaeth gymharol.
- Mapio data darpariaeth Arolwg 2015 ar Chwaraeon Ysgol. Mae'r gwaith hwn yn dangos ble mae caeau glaswellt a chaeau artiffisial mewn ysgolion yn agored i'r cyhoedd ar wahanol adegau o'r dydd ac ar benwythnosau.

Mae Chwaraeon Cymru'n ymgynghorai statudol ar faterion cynllunio perthnasol i newidiadau mewn darpariaeth o gaeau chwarae. Mae gan Chwaraeon Cymru gytundeb partneriaeth yn ei le gyda Fields in Trust i eirioli manteision caeau glaswellt naturiol a'u gwarchod. Mae system barhaus yn ei lle i fonitro'r gwaith hwn.

Mae Ymddiriedolaeth CBDC yn treialu gwaith gyda Chynghorau ledled Cymru i ddyfeisio Cynlluniau Cyfleusterau Lleol i bennu gweledigaeth tymor hir i warchod a denu buddsoddiad mewn cyfleusterau, yn ogystal â darbwyllo ysgolion i agor eu cyfleusterau at ddefnydd y gymuned. Mae'r egwyddor o agor cyfleusterau chwaraeon ysgolion y tu allan i oriau ysgol i ddiwallu angen cymunedol yn un mae Chwaraeon Cymru'n ei gefnogi.

**Argymelliad 16.** *Rydym yn argymell bod Chwaraeon Cymru'n mynd ati i hybu a gwarchod mynediad i'r holl gyfleusterau sy'n eiddo i awdurdodau lleol ar gyfer pawb.*

### **Ymateb Chwaraeon Cymru**

Mae Chwaraeon Cymru wedi ymrwymo i hybu cyfranogiad ac annog mwy o bobl i gymryd rhan mewn chwaraeon, gan sicrhau bod pawb yn gallu byw yn egniol drwy chwaraeon a gwireddu eu potensial.

Bydd Chwaraeon Cymru'n parhau i weithredu'n briodol er mwyn hybu a gwarchod mynediad i'r holl gyfleusterau chwaraeon yng Nghymru ar gyfer pawb. Er mai cyfrifoldeb pob awdurdod lleol yw penderfynu ar ystod, cost a hygyrchedd y cyfleusterau chwaraeon o dan eu rheolaeth, bydd Chwaraeon Cymru'n parhau i hybu a gweithio gydag Awdurdodau Lleol i warchod mynediad i gyfleusterau.

Mae Chwaraeon Cymru wedi ymgymryd â'r gwaith canlynol:

- Datblygu [Cyfleusterau ar gyfer Cenedlaethau'r Dyfodol: Glasbrint ar gyfer Chwaraeon a Hamdden Egniol yng Nghymru](#) Datblygodd Chwaraeon Cymru'r ddogfen arweiniol yma gyda chefnogaeth gan y sector chwaraeon fel bod darparwyr mawr ar gyfleusterau – gan gynnwys llywodraeth leol – yn gallu cynllunio'n strategol a rheoli cyfleusterau chwaraeon yn y tymor hir
- Mae Chwaraeon Cymru'n parhau i ddarparu cefnogaeth barhaus i Lywodraeth Cymru wrth iddo ddatblygu Strategaeth Cyfleusterau Chwaraeon ar gyfer Cymru. Mae hyn yn cynnwys dadansoddi'r anghenion am gyfleusterau yn y dyfodol ar lefel gymunedol ac elitaidd / perfformio
- Ar hyn o bryd, mae Chwaraeon Cymru'n datblygu polisi ar sut orau i gefnogi trosglwyddo asedau'n effeithiol o ran cyfleusterau chwaraeon ar raddfa fechan (ee. caeau, pafiliynau). Yn aml, mae'r rheolaeth ar gyfleusterau chwaraeon yn cael ei throsglwyddo o ofal yr awdurdodau lleol i grwpiau cymunedol lleol ac mae Chwaraeon Cymru'n cefnogi dull o weithredu i sicrhau bod y trosglwyddo'n creu datrysiad rheoli cynaliadwy a thymor hir
- Mae Chwaraeon Cymru'n darparu cyngor cyson ar gyfer Rhaglen Ysgolion yr 21<sup>ain</sup> Ganrif Llywodraeth Cymru, i sicrhau bod ysgolion yn datblygu cyfleusterau chwaraeon priodol ac i sicrhau eu bod yn hygyrch i grwpiau cymunedol lleol
- Mae Chwaraeon Cymru'n ymgynghorai statudol ar faterion cynllunio perthnasol i newidiadau mewn darpariaeth o gaeau chwarae. Mae gan Chwaraeon Cymru gytundeb partneriaeth yn ei le gyda Fields in Trust i eirioli manteision caeau glaswellt naturiol ac i'w gwarchod
- Mae Chwaraeon Cymru'n dosbarthu grantiau'r Loteri sy'n cael eu defnyddio i ddatblygu rhagor o gyfleoedd chwaraeon mewn cyfleusterau presennol, gan gynnwys cynlluniau gwella cyfalaf ar raddfa fechan (er enghraifft, cynlluniau draenio caeau)

## Rhaglenni Pobl Ifanc

### 1. Aml-Sgiliau a Champau'r Ddraig

#### Nod y rhaglen

Aml-Sgiliau a Champau'r Ddraig yw'r cam nesaf ar y siwrnai llythrennedd corfforol ar ôl Chwarae i Ddysgu (3 i 7 oed). Y nod yw i bobl ifanc 7 i 11 oed wneud y canlynol:

- Parhau ar hyd eu siwrnai llythrennedd corfforol drwy ddatblygu'r sgiliau corfforol allweddol sy'n berthnasol i amrywiaeth o wahanol chwaraeon ac yn drosglwyddadwy ar eu traws;
- Mynd ati i recriwtio mwy o rieni, athrawon ac arweinwyr ifanc i arwain chwaraeon a darparu llwybrau ar eu cyfer at wirfoddoli, hyfforddi, dyfarnu neu weinyddu;
- Cefnogi clybiau cymunedol i ddatblygu eu darpariaeth ar gyfer plant 7 i 11 oed, gan gryfhau'r cysylltiadau rhwng clybiau ac ysgolion.

#### Dysgu a gwerthuso ffurfiol

- Adroddiadau Gwybodaeth Reoli Lleol / Rhanbarthol i helpu i roi gwybodaeth i randdeiliaid am y ddarpariaeth yn eu hardal leol; rheoli perfformiad staff; adrodd ar dargedau DPA i Lywodraeth Cymru
- **Adolygiad o Gampau'r Ddraig – Aml-sgiliau – Adroddiad Interim (Mawrth 2010) gan Sue Burgess**
- **Adolygiad o Gampau'r Ddraig (Awst 2010) gan Arad Consulting**
- **Gwerthusiad Peilot o Aml-Sgiliau'r Ddraig (Mai 2012) gan Bright Purpose**
- **Gwerthusiad annibynnol (2017) I'w gwblhau ym mis Mehefin 2018**

### 2. Ysgolion Uwchradd - 5x60

#### Nod y rhaglen

Gan adeiladu ar y datblygiadau cynnar a gyflawnwyd drwy Chwarae i Ddysgu ac Aml-Sgiliau a Champau'r Ddraig, y nod yw i bobl ifanc 11 i 16 oed wneud y canlynol:

- Parhau ar hyd eu siwrnai llythrennedd corfforol drwy ddatblygu ymhellach y sgiliau corfforol allweddol sy'n berthnasol i amrywiaeth o wahanol chwaraeon ac yn drosglwyddadwy ar eu traws;
- Cefnogi clybiau cymunedol i ddatblygu eu darpariaeth ar gyfer ieuenctid 11 i 16 oed, gan gryfhau'r cysylltiadau rhwng clybiau ac ysgolion;
- Mynd ati i recriwtio arweinwyr ifanc i arwain chwaraeon a darparu llwybrau ar eu cyfer at wirfoddoli, hyfforddi, dyfarnu neu weinyddu.

#### Dysgu a gwerthuso ffurfiol

- Adroddiadau Gwybodaeth Reoli Lleol / Rhanbarthol i helpu i roi gwybodaeth i randdeiliaid am y ddarpariaeth yn eu hardal leol; fel adnodd rheoli perfformiad lleol; adrodd ar dargedau DPA i Lywodraeth Cymru
- **Adolygiad cam cyntaf y peilot (2006) gan InVEST**

- Gwerthuso'r rhaglen 5x60: Adroddiad ar y cynnydd i Lywodraeth Cynulliad Cymru (2009) gan **Greenstreet Berman Limited**
- Gwerthusiad Proses o gynllun 5x60: Adroddiad Terfynol (2010) gan **Greenstreet Berman Limited**
- Gweithgarwch Corfforol, Chwaraeon Allgyrsiol a'r Fenter '5x60': Ffyrdd o Fyw Hamdden a Phobl Ifanc yng Nghymru, 2007-2009 (2011) – **Traethawd PhD gan Anna Leyshon** (Prifysgol Metropolitan Caerdydd)
- Cyfranogiad Chwaraeon ymhlith ieuenctid 14 i 21 oed. Sut mae annog pobl ifanc i ddal ati i gymryd rhan mewn chwaraeon? (2012) **Adroddiad terfynol i Chwaraeon Cymru gan Brightpurpose**
- Adroddiad Gwerthusiad 5x60: Cysylltu ysgolion â'r gymuned i gynnal cyfranogiad (2012) gan **S Wilcox (prosiect ymchwil – Prifysgol De Cymru)**
- Adolygiad o Fuddsoddiad mewn Chwaraeon Ysgol (2015) – **adolygiad mewnol gan Chwaraeon Cymru**
- Gwerthusiad annibynnol (2017) **I'w gwblhau ym mis Mehefin 2018**

## Siwrnai Llythrennedd Corfforol

Mae Aml-Sgiliau a Champau'r Ddraig a 5x60 yn ddau ddull o weithredu i gefnogi siwrnai llythrennedd corfforol person ifanc. Maent yn adeiladu ar y datblygiadau cynnar a gyflawnwyd drwy Chwarae i Ddysgu i alluogi continiwm o ddysgu cynyddol.

Mae'r fideo diweddar yma 'Stori Lwyddiannus Ers 15 Mlynedd' <https://vimeo.com/211272295> yn dangos manteision a chyflawniadau ein buddsoddiad mewn AG a chwaraeon ysgol a chymunedol.

## Astudiaethau Achos

### Amser Stori Egniol

Ym mis Mehefin, cynhaliodd cydweithwyr yng Nghonwy 3 diwrnod o hyfforddiant Amser Stori Egniol i aelodau o staff yn y 10 llyfrgell yng Nghonwy, ac ar gyfer y 36 o leoliadau cyn ysgol iach. Yn ystod y 3 diwrnod, daeth mwy nag 80 o bobl i'r hyfforddiant a gyflwynwyd gan Sharon Mason o 'Play Learn Play'.

Nod y prosiect yw annog y lleoliadau cymunedol yma i gyflwyno elfen newydd yn eu hamseroedd stori. Drwy ddod â llyfrau'n fyw gan ddefnyddio pypedau a symudiadau, gallwn sicrhau bod plant Conwy'n egniol, yn iach ac yn dysgu sgiliau am oes. Drwy gefnogi'r lleoliadau hyn i annog plant i symud, rydym yn sicrhau eu bod yn cael cychwyn cadarn ar eu siwrnai llythrennedd corfforol.

Isod ceir fideo byr o'r dyddiau hyfforddi, yn esbonio eu pwrpas. Mae sawl lleoliad yn cynnal y sesiynau hyn eisoes.

[https://www.youtube.com/watch?v=\\_qc0GoJyhWo](https://www.youtube.com/watch?v=_qc0GoJyhWo)

### Hyfforddiant dan arweiniad Llysgenhadon Ifanc i lywodraethwyr ysgolion yng Nghonwy

Hyfforddiant dan arweiniad Llysgenhadon Ifanc - Hyfforddiant i Lywodraethwyr Ysgolion ar lythrennedd corfforol ac effaith cyfleoedd aml-chwaraeon fel rhan o ddarpariaeth allgyrsiol.

Mae hwn yn ddull newydd a gwahanol o geisio dylanwadu ar Lywodraethwyr Ysgolion sydd â chyfrifoldeb am feysydd Iechyd a Lles yn y Cwricwlwm Cenedlaethol, o ran deall pwysigrwydd a blaenoriaeth i llythrennedd corfforol mewn ysgolion (cyflwynir gan Lysgenhadon Ifanc AUR ledled y sir), gan gysylltu hyn hefyd ag agenda gwasanaethau addysg yr ALL o “hybu iechyd a lles y dysgwr” a “DPA yn canolbwyntio ar lais y dysgwr”.

Cafwyd effaith bositif a cheir tystiolaeth o hynny yng nghanlyniadau'r Arolwg ar Chwaraeon Ysgol. Cynyddodd canran y disgyblion sy'n cymryd rhan mewn chwaraeon 3+ o weithiau yr wythnos o 39% yn 2013 i 79% yn 2015. Hefyd bu cynnydd o 19 pwynt canran yn y disgyblion oedd yn teimlo bod rhywun yn gwrando arnynt.

### **Ysgol AAA Sant Christopher, Wrecsam**

Cyfleoedd Arweinyddiaeth a Chyfranogiad mewn lleoliad AAA.

Y llynedd cwblhaodd 20 o ddisgyblion y dyfarniad Arweinydd Chwaraeon Lefel 2 yn llwyddiannus. Mae'r grŵp wedi cronni mwy nag 80 awr o brofiad arwain. Darbwylodd y disgyblion eu hunain y Swyddog 5x60 i ddechrau'r cwrs Lefel 3 eleni. Mae'r disgyblion yn gwirfoddoli yn y gymuned yn awr ac yn mentora disgyblion iau. Hefyd mae'r disgyblion yn gwirfoddoli mewn Gwyliau AAA ar gyfer Ysgolion Iau Wrecsam.

Mae'r ysgol yn falch iawn o gyflawniadau'r disgyblion a'r ffaith bod hyn yn profi bod posib goresgyn ffiniau. Mae'r Arweinydd hyn wedi gweld yn uniongyrchol beth sy'n bosib ei gyflawni ac mae wedi bod yn siwrnai ryfeddol i bawb yn yr ysgol.

### **Mynd i'r afael â throseddau, ymddygiad anghymdeithasol ac ieuencid sydd wedi ymddieithrio, Sir y Fflint**

Drwy weithio gyda phartneriaid allweddol, fel y tîm Cyffuriau ac Alcohol, y gwasanaeth ieuencid, addysg ac ysgolion a Heddlu Gogledd Cymru, rydym wedi lansio system clwb 'carreg y drws' ar gyfer ymddygiad anghymdeithasol. Mae'r clybiau'n weithredol ar hyn o bryd yn Hope, Penarlâg, Fflint, Glannau Dyfrdwy a'r Wyddgrug. Mae'r cyfranogiad yn amrywio rhwng 15 a 45 y sesiwn. Rydym wedi defnyddio pêl droed yn bennaf fel cyfrwng i ymgysylltu, ond hefyd wedi defnyddio golff, ffitrwydd a'r sba yn y dull hwn o weithio. Drwy weithio gyda chlybiau, cyrff rheoli cenedlaethol a darparwyr, rydym wedi gallu cynnig darpariaeth gynaliadwy am bris fforddiadwy i annog mwy o gymryd rhan.

### **Llwybr Arweinydd Ifanc**

Mae tîm datblygu chwaraeon Sir Fynwy wedi prynu trwydded gan Sports Leaders UK fel eu bod yn cael hyfforddi pob disgybl ym Mlwyddyn 5 yn Nyfarniad Arweinyddiaeth Play Maker (tua 1000 o ddisgyblion). Mae'r dyfarniad yn canolbwyntio ar ddatblygu sgiliau arweinyddiaeth dysgwyr. Bydd y Lysgenhadon Ifanc Efydd yn cael eu dewis drwy Play Makers i arwain a hyrwyddo chwaraeon a gweithgarwch corfforol yn yr ysgolion.

### **Gwent Egniol – Llythrennedd Corfforol**

Mae rhanbarth Gwent Egniol wedi cydweithio i ddatblygu cyfleoedd llythrennedd corfforol ledled y rhanbarth. Yn ystod 2016/17, sefydlwyd 500 o sesiynau llythrennedd corfforol mewn cymunedau ar draws Gwent. Mae datblygu strwythurau clybiau iau ledled y rhanbarth wedi bod yn ffocws drwy wella sgiliau mwy na 490 o hyfforddwyr a 570 o rieni o ran eu dealltwriaeth o sut i ddatblygu plant a phobl ifanc llythrennog yn gorfforol.

### **Rhaglen Dyfodol Positif Gwent Egniol**

**Cyllid:** £70k o gyllid gan Chwaraeon Cymru wedi'i gyfateb gan Gomisiynydd Heddlu a Throseddu Gwent

Mae Dyfodol Positif Gwent yn rhaglen cynhwysiant cymdeithasol seiliedig ar chwaraeon. Mae'n defnyddio chwaraeon fel adnodd i gynnwys pobl ifanc mewn cymunedau sydd wedi'u datgan fel 'leoliadau problemus' gan bartneriaid, neu drwy gyfeirio i leoliadau addysg amgen. Yn ystod 2016-17, mae'r rhaglen wedi gweithio gyda mwy na 9,000 o bobl ifanc i'w cael i gymryd rhan mewn chwaraeon a gweithgarwch corfforol, gan arwain at y canlynol:

- Cynnydd mewn cymryd rhan mewn chwaraeon ymhlith plant a phobl ifanc oedd wedi ymddieithrio;
- Llai o ymddygiad anghymdeithasol ar adegau allweddol gan fod gweithgarwch chwaraeon wedi rhoi pwrpas arall i bobl ifanc;
- Llai o ymddygiad anghymdeithasol ar adegau allweddol o'r flwyddyn; a
- Cynnydd mewn presenoldeb mewn ysgolion, datblygiad personol ac ymgysylltu ymhlith pobl ifanc mewn perygl o beidio â bod mewn addysg, gwaith na hyfforddiant (NEETs).